

TPM: Gabung sekolah vernakular kurang murid
Utusan Online
08 April, 2012

PAGOH 7 April - Sekolah vernakular yang kurang murid boleh bergabung dengan mana-mana sekolah sealiran bagi mengatasi masalah tersebut tetapi keputusan itu perlu mendapat persetujuan masyarakat dan Persatuan Ibu Bapa dan Guru (PIBG) sekolah berkenaan.

Timbalan Perdana Menteri, Tan Sri Muhyiddin Yassin berkata, langkah tersebut adalah untuk kepentingan pendidikan selain manfaat bagi murid dan guru di sekolah jenis itu.

Muhyiddin yang juga Menteri Pelajaran berkata, langkah itu bukan bermakna kerajaan mahu menutup sekolah aliran tersebut tetapi memberi pilihan kepada mereka untuk kebaikan bersama.

"Untuk kepentingan pendidikan lebih baik ada persetujuan (gabung sekolah), ini kena cakap baik (terang), nanti ada kata kerajaan nak tutup sekolah (vernakular).

"Kalau ada persetujuan, bolehlah berpindah ke sekolah lain, jadi boleh bersatu, itu kita boleh setujukan tetapi terserah kepada PIBG dan masyarakat di kawasan berkenaan," katanya.

Beliau berkata demikian pada sidang akhbar selepas Majlis Jalinan Mesra Warga Pendidikan dan Perasmian Dewan-dewan Sekolah di Parlimen Pagoh di Sekolah Kebangsaan (SK) Panchor, dekat sini hari ini.

Muhyiddin memberitahu, terdapat 1,800 sekolah vernakular iaitu 1,200 adalah Sekolah Jenis Kebangsaan Cina (SJKC) manakala selebihnya Sekolah Jenis Kebangsaan Tamil (SJKT).

Jelasnya, 45 peratus daripadanya dikategorikan sekolah kurang murid tetapi kerajaan tidak pernah menutupnya kerana telah ada persetujuan sebelum ini untuk tidak berbuat demikian.

Menurutnya, nisbah bagi sekolah vernakular yang kurang murid ialah untuk 10 murid disediakan tujuh guru tetapi pendekatan itu dilihat kurang berkesan untuk meningkatkan prestasi.

"Prestasi pun tak berapa baik kerana ada guru terpaksa mengajar dalam beberapa kelas yang pelbagai. Kemudian tiada peluang bergaul, tiada peluang belajar secara berkumpulan kerana (bilangan murid) kecil sangat, kesannya (sekolah kurang murid) tidak berapa baik," katanya.

Terdahulu beliau merasmikan majlis pecah tanah SJKT Ladang Temiang di Renchong, dekat sini, untuk pembinaan sekolah baru yang bernilai kira-kira RM11 juta.

Muhyiddin berkata, kerja-kerja pembinaan SJKT tersebut akan dimulakan dalam masa dua atau tiga bulan lagi dan mengambil masa 24 bulan untuk disiapkan.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0408&pub=Utusan_Malaysia&sec=Dalam_Negeri&pg=dn_02.htm